



四川大學古籍整理研究所編

儒藏

史部
第二十二冊

四川大學出版社



四川大學古籍整理研究所 編

儒藏·史部

孔孟史志

第十二冊

四川大學出版社 二〇〇五年



儒藏

目

錄

目錄

孔子言行類纂二（卷一四至卷二九）	邱進之 王開隊 校點 舒大剛 審稿	一
孔子弟子資料類編一（卷一至卷二三）	李冬梅 校點 郭齊 審稿	三〇三

孔子言行類纂卷十四

民族·博物

民族

論語八佾 子曰、夷狄之有君、不如諸夏之亡也。

又子罕 子欲居九夷。或曰、陋、如之何。子曰、君子居之、何陋之有。

春秋左傳定公十年 夏、公會齊侯於祝其、實夾谷。孔丘相、犁彌言於齊侯曰、孔丘知禮而無勇、若使萊人以兵劫魯侯、必得志焉。齊侯從之。孔丘以公退、曰、士兵之。兩君合好、而裔夷之俘以兵亂之、非齊君所以命諸侯也。裔不謀夏、夷不亂華（略）。

春秋穀梁傳定公十年 夏、公會齊侯於夾谷、公至自夾谷。離會不致。何爲致也。危之也。危之、則以地致何也。爲危之也。其危奈何。曰、夾谷之會、孔子相焉。兩君就壇、兩相相揖、齊人鼓譟而起、欲以執魯君。孔子歷階而上、不盡一等、而視歸乎齊侯曰、

兩君合好、夷狄之民何爲來爲。命司馬止之。齊侯逡巡而謝曰、寡人之過也。退而屬其二三大夫曰、夫人率其君與之行古人之道、二三子獨率我而入夷狄之俗、何爲。

新語辨惑 魯定公之時、與齊侯會於夾谷、孔子行相事。兩君升壇、兩相處下、兩相欲揖、君臣之禮、濟濟備焉。齊人鼓譟而起、欲執魯公。孔子歷階而上、不盡一等而立、謂齊侯曰、兩君合好、以禮相率、以樂相化。臣聞嘉樂不野合、犧象之薦不下堂。夷狄之民何求爲。命司馬請止之。定公曰、諾。

孔子家語相魯 定公與齊侯會于夾谷、孔子攝相事。曰、臣聞有文事者必有武備、有武事者必有文備。古者諸侯竝出疆、必具官以從。請具左右司馬。定公從之。至會所、爲壇位、土階三等、以遇禮相見。揖讓而登、獻酢既畢、齊使萊人以兵鼓譟、劫定公。孔子歷階而進、



以公退曰、士以兵之。吾兩君爲好、裔夷之俘敢以兵亂之、非齊君所以命諸侯也。裔不謀夏、夷不亂華、俘不干盟、兵不偪好、于神爲不祥、于德爲僭義、于人爲失禮、君必不然。齊侯心作、麾而避之。

呂氏春秋上德 三苗不服、禹請攻之。舜曰、以德可也。行德三年、而三苗服。孔子聞之曰、通乎德之情、則孟門、太行不爲險矣。故曰德之速、疾乎以郵傳命。

漢書韋賢傳 周室既衰、四夷並侵、(略)中國不絕如綫。春秋紀齊桓南伐楚、北伐山戎、孔子曰、微管仲、吾其被髮左衽矣。是故棄桓之過而錄其功、以爲伯首。

後漢書東夷列傳 王制云、東方曰夷。夷者、柢也、言仁而好生、萬物柢地而出。故天性柔順、易以道御、至有君子、不死之國焉。夷有九種、曰畎夷、于夷、

方夷、黃夷、白夷、赤夷、玄夷、風夷、陽夷。故孔子欲居九夷也。

又 仲尼懷憤、以爲九夷可居。或疑其陋、子曰、君子居之、何陋之有。亦徒有以焉爾。

博物

中庸第十三章 子曰、素隱行怪、後世有述焉、吾弗爲之矣。君子遵道而行、半塗而廢、吾弗能已矣。君子依乎中庸、遯世不見知而不悔、唯聖者能之。春秋左傳昭公十七年 秋、郟子來朝、公與之宴。昭子問焉、曰、少皞氏鳥名官、何故也。郟子曰、吾祖也、我知之。昔者黃帝氏以云紀、故爲云師而云名。炎帝氏以火紀、故爲火師而火名。共工氏以水紀、故爲水師而水名。大皞氏以龍紀、故爲龍師而龍名。我高祖少皞摯之立也、鳳鳥適至、故紀於鳥、爲鳥師而鳥名。鳳鳥氏、曆正也。玄鳥氏、司分者也。伯趙氏、司至者也。青鳥氏、司啓者也。丹鳥氏、司閉者



也。祝鳩氏、司徒也。鵠鳩氏、司馬也。鴈鳩氏、司空也。爽鳩氏、司寇也。鵯鳩氏、司事也。五鳩、鳩民者也。五雉爲五工正、利器用、正度量、夷民者也。九扈爲九農正、扈民無淫者也。自顓頊以來、不能紀遠、乃紀於近。爲民師而命以民事、則不能故也。仲尼聞之、見於郕子而學之。既而告人曰、吾聞之、天子失官、學在四夷、猶信。

孔子家語辯物 郕子朝魯。魯人問曰、少昊氏以鳥名官、何也。對曰、吾祖也、我知之。昔黃帝以雲紀官、故爲雲師而雲名。炎帝以火、共工以水、大昊以龍、其義一也。我高祖少昊摯之立也、鳳鳥適至、是以紀之於鳥、故爲鳥師而鳥名。自顓頊氏以來、不能紀遠、乃紀於近、爲民師而命以民事、則不能故也。孔子聞之、遂見郕子而學焉。既而告人曰、吾聞之、天子失官、學在四夷、猶信。

又定公十五年 夏五月壬申、公薨。仲尼曰、賜不幸言而中、是使賜多言者也。

孔子家語辯物 邾隱公朝于魯、子貢觀焉。邾子執玉高、其容仰。定公受玉卑、其容俯。子貢曰、以禮觀之、二君者將有死亡焉。夫禮、生死存亡之體、將左右周旋、進退俯仰、於是乎取之、朝祀喪戎、於是乎觀之。今正月相朝、而皆不度、心以亡矣。嘉事不體、何以能久。高仰驕、卑俯替、驕近亂、替近疾。君爲主、其先亡乎。夏五月、公薨。又邾子出奔。孔子曰、賜不幸而言中、是賜多言。

春秋穀梁傳桓公二年 夏四月、取郕大鼎於宋。戊申、納於大廟。桓內弑其君、外成人之亂、受賂而退、以事其祖、非禮也。其道以周公爲弗受也。郕鼎者、郕之所爲也。曰宋、取之宋也。以是爲討之鼎也。孔子曰、名從主人、物從中國、故曰郕大鼎也。

國語魯語下 季桓子穿井、如獲土缶、其中有羊焉。使問之仲尼曰、吾穿井而獲狗、何也。對曰、以丘之所聞、羊也。丘聞之、木石之怪曰夔、蜺、水之怪曰龍、罔象、土之怪曰墳羊。

孔子家語辯物 季桓子穿井、獲如土缶、其
中有羊焉。使使問孔子曰、吾穿井于費、而于
井中得一狗、何也。孔子曰、丘之所聞者、羊也。
丘聞之、木石之怪夔、蜺、水之怪龍、罔象、土
之怪墳羊也。

說苑辨物 季桓子穿井得土缶、中有羊、以
問孔子、言得狗。孔子曰、以吾所聞、非狗、乃羊
也、木石之怪夔、罔兩、水之怪龍、罔象、土之怪
墳羊也、非狗也。桓子曰、善哉。

漢書五行志中下 史記魯定公時、季桓子
穿井、得土缶、中得蟲若羊、近羊禍也。羊者、地
上之物、幽於土中、象定公不用孔子而聽季

氏、暗昧不明之應也。

搜神記賁羊 季桓子穿井、獲如土缶、其中
有羊焉。使問之仲尼曰、吾穿井而獲狗、何耶。
仲尼曰、以丘所聞、羊也。丘聞之、木石之怪夔、
蜺、水中之怪龍、罔象、土中之怪曰賁羊。

又 吳伐越、墮會稽、獲骨焉、節專車。吳子使來好
聘、且問之仲尼曰、無以吾命。賁發幣於大夫、及仲
尼、仲尼爵之。既徹俎而宴、客執骨而問曰、敢問骨
何爲大。仲尼曰、丘聞之、昔禹致羣神於會稽之山、
防風後至、禹殺而戮之、其骨節專車。此爲大矣。客
曰、敢問誰守爲神。仲尼曰、山川之靈、足以紀綱天
下者、其守爲神。社稷之守者爲公侯。皆屬於王者。
客曰、防風何守也。仲尼曰、汪芒氏之君也、守封嵎
之山者也、爲漆姓。在虞夏商爲汪芒氏、於周爲長
狄、今爲大人。客曰、人長之極幾何。仲尼曰、焦僈氏
長三尺、短之至也。長者不過十之、數之極也。



孔子家語辨物 吳伐越、隳會稽、獲巨骨一

節、專車焉。吳子使來聘于魯、且問之孔子、命

使者曰、無以吾命也。賓既將事、乃發幣於大

夫及孔子、孔子爵之。既徹俎而燕、客執骨而

問曰、敢問骨何如爲大。孔子曰、丘聞之、昔禹

致羣臣於會稽之山、防風後至、禹殺而戮之、

其骨專車焉。此爲大矣。客曰、敢問誰守爲神。

孔子曰、山川之靈、足以紀綱天下者、其守爲

神。社稷之守爲公侯、山川之祀者爲諸侯、皆

屬于王。客曰、防風何守。孔子曰、汪芒氏之君、

守封嵎山者、爲漆姓。在虞夏商爲汪芒氏、于

周爲長翟氏、今日大人。客曰、人長之極、幾何。

孔子曰、焦僈氏長三尺、短之至也。長者不過

十、數之極也。

說苑辨物 吳伐越、隳會稽、得骨專車。使使

問孔子曰、骨何者最大。孔子曰、禹致羣臣會

稽山、防風氏後至、禹殺而戮之、其骨節專車。

此爲大矣。使者曰、誰爲神。孔子曰、山川之靈、

足以紀綱天下者、其守爲神、社稷爲公侯、山

川之祀爲諸侯、皆屬於王者。曰、防風氏何守。

孔子曰、汪芒之君、守封嵎之山者也、其神爲

釐姓、在虞夏爲防風氏、商爲汪芒氏、於周爲

長狄氏、今謂之大人。使者曰、人長幾何。孔子

曰、焦僈氏三尺、短之至也、長者不過十、數之

極也。使者曰、善哉、聖人也。

水經注淮水 郡國志曰、平阿縣有塗山。淮

出於荆山之左、當塗之右、奔流二山之間、而

揚濤北注也。春秋左傳哀公十年、大夫對孟

孫曰、禹會諸侯於塗山、執玉帛者萬國。杜預

曰、塗山在壽春東北。非也。余按國語曰、吳伐

楚、隳會稽、獲骨焉、節專車。吳子使來聘、且問

之、客執骨而問曰、敢問骨何爲大。仲尼曰、丘

聞之、昔禹致羣神於會稽之山、防風氏後至、禹殺之、其骨專車、此爲大也。蓋丘明親承聖旨、錄爲實證矣。又按劉向說苑辨物、王肅之叙孔子廿二世孫孔猛所出先人書家語、並出此事。故塗山有會稽之名。考校羣書及方土之目、疑非此矣。

又 仲尼在陳、有隼集於陳侯之庭而死、楷矢貫之石罍、其長尺有咫。陳惠公使人以隼如仲尼之館問之。仲尼曰、隼之來也遠矣。此肅慎氏之矢也。昔武王克商、通道於九夷百蠻、使各以其方賄來貢、使無忘職業。於是肅慎氏貢楷矢石罍、其長尺有咫。先王欲昭其令德之致遠也、以示後人、使永監焉。故銘其括曰肅慎氏之貢矢、以分大姬、配虞胡公而封諸陳。古者分同姓以珍玉、展親也、分異姓以遠方之職貢、使無忘服也、故分陳以肅慎氏之貢。君若使有司求諸故府、其可得也。

孔子家語辨物 孔子在陳、陳惠公賓之于上館。時有隼集于陳侯之庭而死、楷矢貫之石罍、其長尺有咫。惠公使人持隼如孔子館而問焉。孔子曰、隼之來遠矣、此肅慎氏之矢。昔武王克商、通道于九夷百蠻、使各以其方賄來貢、而無忘職業。于是肅慎氏貢楷矢石罍、其長尺有咫。先王欲昭其令德之致遠物也、以示後人、使永監焉。故銘其括曰、肅慎氏貢楷矢括。以分大姬、配胡公而封諸陳。古者分同姓以珍玉、所以展親親也。分異姓以遠方之職貢、所以無忘服也。故分陳以肅慎氏貢焉。君若使有司求諸故府、其可得也。公使人求、得之金櫝、如之。

說苑辨物 仲尼在陳、有隼集於陳侯之廷而死、楷矢貫之石罍、矢長尺有咫。陳侯使問孔子、孔子曰、隼之來也遠矣、此肅慎氏之矢



也。昔武王克商、通道九夷、百蠻、使各以其方賄來貢、思無忘職業。於是肅慎氏貢楷矢、石弩、長尺而咫。先王欲昭其令德之致、故銘其栝、肅慎氏貢楷矢。以勞太姬、配虞胡公而封諸陳。分同姓以珍玉、展親也。分別姓以遠方職貢、使無忘服也。故分陳以肅慎氏之矢。試求之故府、果得焉。

漢書五行志下上 史記、魯哀公時有隼集於陳廷而死、楷矢貫之石弩、長尺有咫。陳閔公使使問仲尼、仲尼曰、隼之來遠矣。昔武王克商、通道百蠻、使各以方物來貢、肅慎貢楷矢、石弩長尺有咫。先王分異姓以遠方職、使毋忘服、故分陳以肅慎矢。試求之故府、果得之。

韓非子外儲說左下 魯哀公問於孔子曰、吾聞古者有夔一足、其果信有一足乎。孔子對曰、不也、

夔非一足也。夔者忿戾惡心、人多不說喜也。雖然、其所以得免於人害者、以其信也。人皆曰、獨此一足矣。夔非一足也、一而足也。哀公曰、審而是、固足矣。一曰、哀公問於孔子曰、吾聞夔一足、信乎。曰、夔人也、何故一足。彼其無他異、而獨通於聲。堯曰、夔一而足矣、使爲樂正。故君子曰、夔有一、足、非一足也。

呂氏春秋察傳 魯哀公問於孔子曰、樂正夔一足、信乎。孔子曰、昔者舜欲以樂傳教於天下、乃令重黎舉夔於草莽之中而進之、舜以爲樂正。夔於是正六律、和五聲、以通八風、而天下大服。重黎又欲益求人、舜曰、夫樂、天地之精也、得失之節也、故唯聖人爲能和。樂之本也。夔能和之、以平天下。若夔者一而足矣。故曰夔一足、非一足也。

風俗通義正失 魯哀公問於孔子、樂正夔

一足、信乎。孔子曰、昔者舜以夔爲樂正、始治六律、和均五聲、以通八風、而天下服。重黎又薦能爲音者、舜曰、夫樂天地之精、得失之節、故唯聖人爲能和樂之本。夔能之和、平天下、若夔一足矣。故曰夔一足、非一足行。

孔子家語致思 楚王渡江、江中有物大如斗、圓而赤、直觸王舟。舟人取之。王大怪之、遍問羣臣、莫之能識。王使使聘于魯、問于孔子。子曰、此所謂萍實者也。吉祥也。唯霸者爲能獲焉。使者反、王遂食之。大美。久之使來、以告魯大夫。大夫因子游問曰、夫子何以知其然乎。曰、吾昔之鄭、過乎陳之野、聞童謠曰、楚王渡江得萍實、大如斗、赤如日、剖而食之、甜如蜜。此是楚王之應也。吾是以知之。

又辯政 齊有一足之鳥、飛集于宮朝、下止于殿前、舒翅而跳。齊侯大怪之、使使聘魯、問孔子。孔子曰、此鳥名曰商羊、水祥也。昔童兒有屈其一脚、振

訊兩肩、而跳且謠曰、天將大雨、商羊鼓舞。今齊有之、其應至矣。急告民趨治溝渠、修隄防、將有大水爲災。頃之大霖雨、水溢泛諸國、傷害民人、唯齊有備、不敗。景公曰、聖人之言、信而徵矣。

說苑辨物 楚昭王渡江、有物大如斗、直觸王舟、止於舟中。昭王大怪之、使聘問孔子。孔子曰、此名萍實、令剖而食之。惟霸者能獲之。此吉祥也。其後齊有飛鳥、一足、來下、止於殿前。舒翅而跳。齊侯大怪之、又使聘問孔子。孔子曰、此名商羊、急告民趨治溝渠、天將大雨。於是如之。天果大雨、諸國皆水、齊獨以安。孔子歸、弟子請問。孔子曰、異哉。小兒謠曰、楚王渡江得萍實。大如拳、赤如日、剖而食之美如蜜。此楚之應也。兒又有兩兩相牽、屈一足而跳者曰、天將大雨、商羊起舞。今齊獲之、亦其應也。夫謠之後、未嘗不有應隨者也。故聖人

非獨守道而已也、睹物記也、即得其應矣。

又辯物 孔子在陳、陳侯就之、燕遊焉。行路之人云魯司鐸災、及宗廟。以告孔子。子曰、所及者、其桓僖之廟。陳侯曰、何以知之。子曰、禮、祖有功而宗有德、故不毀其廟焉。今桓僖之親盡矣、又功德不足以存其廟、而魯不毀、是以天災加之。三日、魯使至問焉、則桓僖也。陳侯謂子貢曰、吾乃今知聖人之可貴。對曰、君之知之、可矣、未若專其道而行其化之善也。

漢書五行志上 哀公又以季氏之故不用

孔子。孔子在陳聞魯災、曰、其桓釐之宮乎。以爲桓、季氏之所出、釐使季氏世卿者也。

又 季康子問于孔子曰、今周十二月、夏之十月、而猶有蠡、何也。孔子對曰、丘聞之、火伏而後蟄者畢。今火猶西流、司曆過也。季康子曰、所失者幾月也。孔子曰、於夏十月、火既沒矣、今火見、再失閏也。

中論曆數 哀公十二年十二月蠡、季孫問諸仲尼、仲尼曰、丘聞之也、火復而後蟄者畢。今火猶西流、司曆過也。

又 叔孫氏之車士曰子鉏商、採薪於大野、獲麟焉。折其前左足、載以歸。叔孫以爲不祥、棄之於郭外。使人告孔子曰、有譬而角者、何也。孔子往觀之、曰、麟也。胡爲來哉、胡爲來哉。反袂拭面、涕泣沾襟。叔孫聞之、然後取之。子貢問曰、夫子何泣爾。孔子曰、麟之至、爲明王也。出非其時而見害、吾是以傷焉。

說苑復恩 孔子曰、北方有獸、其名曰麇、前足鼠、後足兔。是獸也、甚矣其愛蚤蚤巨虛也。食得甘草、必齧以遺蚤蚤巨虛、蚤蚤巨虛見人將來、必負麇以走。麇非性之愛蚤蚤巨虛也、爲其假足之故也。二獸者、亦非性之愛麇也、爲其得甘草而遺之故也。



古微書禮緯禮稽命徵 孔子謂子夏曰、鸛鵒至、非中國之禽也。

又春秋緯春秋說題辭 麥之爲言殖也、寢生觸凍而不息、精射刺直、故麥含芒事、且立也。菽者屬也、春生秋熟、理通體屬也。菽赤黑、陰生陽大、體應節小變、象陽色也。精移火、轉生黍、夏出秋改、黍者緒也。故其立字、禾入米爲黍。酒之言乳也、所以策身扶老也。孔子言曰、七變入白、米出甲、謂磴之爲糲米也。春之則稗米也。舂之則鑿米也。苗之則穀米也。又渠擇之、暘嗟之、則爲晶米。

孔子言行類纂卷十五

軼事一

孔子家語本姓解 孔子之先、宋之後也。微子啓、帝乙之元子、紂之庶兄、以圻內諸侯入爲王卿士。微、國名、子爵。初、武王克殷、封紂之子武庚于朝歌、使奉湯祀。武王崩、而與管蔡霍三叔作難、周公相成王東征之。二年、罪人斯得、乃命微子代殷後。作微子之命、申之、與國于宋、徙殷之子孫。唯微子先往仕周、故封之賢。其弟曰仲思、名衍、或名泄、嗣微之後、故號微仲。生宋公稽。胄子雖遷爵易位、而班級不及其故者、得以故官爲稱。故二微雖爲宋公、而猶以微之號自終。至于稽乃稱公焉。宋公生丁公申、申公生縉公共及襄公熙、熙生弗父何及厲公方祀。方祀以下、世爲宋卿。弗父何生宋父周、周生世子勝、勝生正考甫、考甫生孔父嘉。五世親盡、別爲公族、故後以孔爲氏焉。一曰孔父者、生時所

賜號也。是以子孫遂以氏族。孔父生子木金父、金父生畢夷、畢夷生防叔、避華氏之禍而奔魯。防叔生伯夏、伯夏生叔梁紇、雖有九女、是無子。其妾生孟皮、孟皮一字伯尼、有足病。于是乃求婚于顏氏。顏氏有三女、其小曰徵在。顏父問三女曰、爾大夫雖父祖爲士、然其先聖王之裔、今其人身長十尺、武力絕倫、吾甚貪之、雖年長性嚴、不足爲疑。三子孰能爲之妻。二女莫對、徵在進曰、從父所制、將何問焉。父曰、即爾能矣。遂以妻之。徵在既往、廟見、以夫之年大、懼不時有男、而私禱尼丘之山以祈焉。生孔子、故名丘而字仲尼。孔子三歲而叔梁紇卒、葬于防。至十九、娶于宋之亓官氏、一歲而生伯魚。魚之生也、魯昭公以鯉魚賜孔子。榮君之貺、故因以名、曰鯉而字伯魚。魚年五十、先孔子卒。

禮記檀弓上 孔子蚤作、負手曳杖、消搖於門、歌曰、泰山其頽乎、梁木其壞乎、哲人其萎乎。既歌而



入當戶而坐。子貢聞之曰：「泰山其頽，則吾將安仰？梁木其壞，哲人其萎，則吾將安放？夫子殆將病也。」遂趨而入。夫子曰：「賜，爾來何遲也？夏后氏殯於東階之上，則猶在阼也；殷人殯於兩楹之間，則與賓主夾之也；周人殯於西階之上，則猶賓之也。而丘也殷人也。予疇昔之夜，夢坐奠於兩楹之間。夫明王不興而天下其孰能宗予？予殆將死也。」蓋寢疾七日而歿。

又魯哀公誄孔丘曰：「天不遺耆老，莫相予位焉。嗚呼哀哉，尼父。」

又孔子之喪，門人疑所服。子貢曰：「昔者夫子之喪顏淵，若喪子而無服；喪子路亦然。請喪夫子若喪父而無服。」

又孔子之喪，公西赤爲志焉：「飾棺墻，置翣，設披周也。設崇，殷也。綢練設旒，夏也。」

又孔子之喪，有自燕來觀者，舍於子夏氏。子夏

曰：「聖人之葬人，與人之葬聖人也。子何觀焉？」昔者夫子言之曰：「吾見封之若堂者矣，見若坊者矣，見若覆夏屋者矣，見若斧者矣。從若斧者焉。馬鬣封之謂也。今一日而三斬板，而已封，尚行夫子之志乎哉？」

孔子家語終記解 孔子蚤作，負手曳杖，逍遙于門而歌曰：「泰山其頽乎？梁木其壞乎？喆人其萎乎？」既歌而入，當戶而坐。子貢聞之曰：「泰山其頽，則吾將安仰？梁木其壞，吾將安杖？喆人其萎，吾將安放？夫子殆將病也。」遂趨而入。夫子歎而言曰：「賜，汝來何遲？予疇昔夢坐奠于兩楹之間。夏后氏殯于東階之上，則猶在阼；殷人殯于兩楹之間，即與賓主夾之；周人殯于西階之上，則猶賓之。而丘也，殷人也。夫明王不興，則天下其孰能宗余？余逮將死，遂寢病。七日而終，時年七十三矣。」哀公誄曰：「昊天不弔，不愍遺一老。俾屏余一人以在位，瑩瑩余



在疚。於乎哀哉。尼父無自律。子貢曰、公其不沒于魯乎。夫子有言曰、禮失則昏、名失則僇^⑥。失志爲昏、失所爲僇。生不能用、死而諫之、非禮也。稱一人非名、君兩失之矣。既卒、門人疑所以服夫子者。子貢曰、昔夫子之喪顏回也、若喪其子而無服、喪子路亦然。今請喪夫子如喪父而無服。于是弟子皆弔、服而加麻。出有所之、則由經。子夏曰、入宜經可也^⑦。出則不經。子游曰、吾聞諸夫子、喪朋友、居則經、出則否。喪所尊、雖經而出可也。孔子之喪、公西赤^⑧掌殯葬焉。哈以疏米三具、襲衣十有一稱、加朝服一、冠章甫之冠、佩象環、徑五寸而緄組綬。桐棺四寸、柏棺五寸、飭棺牆^⑨。置娶設披、周也。設崇、殷也。綢練設施、夏也。兼用三王禮、所以尊師、且備古也。葬于魯城北泗水上、藏入地不及泉、而封爲偃斧之形、高四尺、樹松柏爲志焉。弟子皆家于墓、行心喪之禮。既葬、有自燕來觀者、舍于子夏氏。子貢謂之曰、

吾亦人之葬聖人、非聖人之葬人、子奚觀焉。昔夫子言曰、見吾封若夏屋者、見若斧矣。從若斧者也、馬鬣封之謂也^⑩。今徒一日三斬板而以封、尚行夫子之志而已、何觀乎哉。二三子三年喪畢、或留或去、惟子貢廬于墓六年。自後羣弟子及魯人處于墓如家者百有餘家、因名其居曰孔里焉。

白虎通喪服 檀弓曰、昔夫子之喪顏回、若喪子而無服、喪子路亦然。請喪夫子若喪父而無服也。

漢書五行志中上 哀公十六年、孔丘卒、公諫之曰、旻天不弔、不憖遺一老、俾屏予一人。子貢曰、君其不歿於魯乎。夫子之言曰、禮失則昏、名失則僇。失志爲昏、失所爲僇。生弗能用、死而諫之、非禮也。稱予一人、非名也。君兩失之。

白虎通崩薨 所以於北方者何、就陰也。檀

弓曰、葬於北方、北首、三代之達禮也。孔子卒、以所受魯君之璜玉葬魯城北。(略)封樹者、可以爲識。故檀弓曰、古也墓而不墳。今丘也、東西南北之人也、不可以不識也。於是封之、崇四尺。

古微書禮緯禮稽命徵 夫子墳方一里、弟子各以四方奇木來植之。

齊民要術卷十 皇覽冢記曰、孔子冢塋中樹數百、皆異種、魯人世世無能名者。人傳言、孔子弟子、異國人、持其國樹來種之。故有柞、枌、雒離、女貞、五味、鳧檀之樹。

金樓子說蕃篇 劉義恭鎮彭城、伐魯郡孔子舊廟柏樹二十四株。經歷漢晉、其大連抱者二株先倒折、土人崇敬、莫之敢犯、義恭悉遣人伐取之、父老莫不嘆息。

史記孔子世家 孔子生魯昌平鄉陬邑。其先宋

人也。曰孔防叔。防叔生伯夏。伯夏生叔梁紇。紇與顏氏女野合而生孔子。禱於尼丘得孔子。魯襄公二十二年而孔子生。生而首上圩頂。故因名曰丘云。字仲尼。姓孔氏。丘生而叔梁紇死。葬於防山。防山在魯東。由是孔子疑其父墓處。母諱之也。孔子爲兒嬉戲、常陳俎豆、設禮容。孔子母死、乃殯五父之衢。蓋其慎也。邠人輓父之母誨孔子父墓。然後往合葬於防焉。孔子要經、季氏饗士、孔子與往。陽虎絀曰、季氏饗士、非敢饗子也。孔子由是退。孔子年十七、魯大夫孟釐子病且死、誡其嗣懿子曰、孔丘、聖人之後、滅於宋。其祖弗父何始有宋而嗣讓厲公。及正考父佐戴、武、宣公、三命茲益恭。故鼎銘云、一命而僂、再命而傴、三命而俯、循牆而走、亦莫敢余侮。鰥於是、粥於是、以餬余口。其恭如是。吾聞聖人之後、雖不當世、必有達者。今孔丘年少好禮、其達者歟。吾即沒、若必師之。及釐子卒、懿子與魯